

9. ZAKLJUČAK

Na osnovu izloženog, cijeneći potrebu izgradnje osnovne škole u naselju Šip, posebno imajući u vidu najbolji interes djece sa ovog područja, ali isto tako imajući u vidu planske dokumente navedene u tački 1. i 2. Elaborata usvojene od strane relevantnih organa Općine i Kantona, te izvršene navedene pripreme radnje od strane Općine Centar, predlažemo Ministarstvu za obrazovanje nauku i mlade Kantona Sarajevo da Vladi i Skupštini Kantona Sarajevo predloži donošenje Odluke o društveno-ekonomskoj opravdanosti osnivanja Javne ustanove Osnovna škola Šip.

Na osnovu člana 18. tačka b), a u vezi sa čl. 13. tačka h) i 14. stav (2) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04 i 6/13), člana 60. stav (4) Zakona o turizmu ("Službene novine Kantona Sarajevo", broj 19/16), Presude Ustavnog suda Federacije Bosne i Hercegovine Broj U-34/13 od 03.07.2014. godine ("Službene novine Federacije BiH", broj 61/14) i Rješenja Ustavnog suda Federacije Bosne i Hercegovine broj U-34/13 od 09.12.2015. godine ("Službene novine Federacije BiH", broj 101/15), Skupština Kantona Sarajevo, na sjednici održanoj dana 07.09.2016. godine, donijela je

ODLUKU

O OSNIVANJU TURISTIČKE ZAJEDNICE KANTONA SARAJEVO

I - OSNOVNE ODREDBE

Član 1.

(Predmet Odluke)

- (1) Ovom odlukom osniva se Turistička zajednica Kantona Sarajevo.
- (2) Osnivač Turističke zajednice Kantona Sarajevo je Kanton Sarajevo (u daljem testu: Kanton).

Član 2.

(Naziv, pravni status i sjedište Turističke zajednice)

- (1) Naziv turističke zajednice glasi: Turistička zajednica Kantona Sarajevo (u daljem tekstu: Turistička zajednica).
- (2) Turistička zajednica ima svojstvo pravnog lica i upisuje se u sudski registar.
- (3) Rad Turističke zajednice je javan.
- (4) Sjedište Turističke zajednice je u Sarajevu, ulica Branilaca Sarajeva broj 21, općina Centar.

II - CILJEVI I DJELATNOST TURISTIČKE ZAJEDNICE

Član 3.

(Osnivanje Turističke zajednice)

Turistička zajednica se osniva radi razvoja turizma, unapređenja turizma i promocije turizma na području Kantona u cjelini i privrednih interesa pravnih i fizičkih lica koja pružaju ugostiteljske i druge turističke usluge ili obavljaju drugu djelatnost neposredno povezanu s turizmom.

Član 4.

(Ciljevi Turističke zajednice)

Ciljevi osnivanja Turističke zajednice su:

- a) unapređenje općih uslova boravka turista kroz formiranje cjelovite turističke ponude, podizanje kvaliteta turističkih i drugih komplementarnih usluga, očuvanje i stvaranje prepoznatljivog i privlačnog turističkog ambijenta Kantona;
- b) razvijanje svijesti o važnosti turizma, kao i privrednim, društvenim i drugim efektima turizma, o potrebi i važnosti očuvanja i unapređenja svih elemenata turističkog proizvoda, a posebno zaštite životne sredine;
- c) podsticanje razvoja turističke infrastrukture i pružanja informacija turistima;
- d) promocija turističkog proizvoda u Kantonu.

Član 5.

(Djelatnost Turističke zajednice)

Turistička zajednica:

- a) objedinjava turističku ponudu Kantona;
- b) upravlja javnom turističkom infrastrukturom koja joj je data na upravljanje od strane osnivača;
- c) preduzima mjere i aktivnosti na kreiranju turističkog proizvoda i turističkog imidža Kantona, kao i radnje na formiranju marke turističkog proizvoda destinacije Kantona;
- d) radi na promociji, plasmanu i podršci realizacije turističkog proizvoda, kao i pojedinih njegovih dijelova, vrijednosti i usluga, koji čine integralni turistički proizvod;
- e) vrši promociju plansko-projektne, plansko-razvojne i investicione dokumentacije iz oblasti turizma i njima komplementarnih djelatnosti;
- f) radi na kontinuiranom inoviranju turističkog proizvoda i aktiviranju novih turističkih prostora;
- g) organizira jedinstveni turistički informacijski sistem, sistem prijave i odjave turista i statističku obradu u skladu sa evropskim standardima;
- h) saraduje u aktivnostima i poslovima vezanim za standardizaciju, kategorizaciju i klasifikaciju turističkog proizvoda, usluga i objekata;
- i) radi na istraživanju turističkog tržišta u cilju pozicioniranja turističkog proizvoda na turističkom tržištu;
- j) prati stanje na turističkom tržištu u cilju blagovremenog donošenja odgovarajućih odluka;
- k) preduzima mjere i aktivnosti za razvoj i promociju turizma u turistički nerazvijenim dijelovima Kantona;
- l) obavlja informativne poslove u vezi sa turističkom ponudom i promoviše turističke ponude Kantona u zemlji i inozemstvu;
- m) saraduje sa turističkim zajednicama u Bosni i Hercegovini, u zemljama u okruženju, Evropi i svijetu;
- n) saraduje sa putničkim agencijama i Kantonalnom javnom ustanovom za zaštićena prirodna područja, vezano za turističke posjete i obilaskе zaštićenih područja;
- o) podstiče, unapređuje, promovira i štiti izvorne vrijednosti i stvara uslove za njihovo korišćenje u granicama održivog razvoja turizma Kantona;
- p) koordinira na poslovima razvoja turizma na lokalnom, entitetskom i državnom nivou;
- r) radi na razvoju gostoprimstva, očuvanju prirodnih i kulturnih vrijednosti i unapređenju ekološke zaštite prostora na kojem djeluje Turistička zajednica;
- s) radi na pripremi i implementaciji događaja (event) od važnosti za Kanton;
- t) obavlja i druge poslove propisane ovim Zakonom o turizmu ("Službene novine Kantona Sarajevo", broj 19/16, u daljem testu: Zakon), ovom odlukom, statutom ili drugim propisom.

III - ORGANI TURISTIČKE ZAJEDNICE

Član 6.

(Organi Turističke zajednice)

- (1) Organi Turističke zajednice su:
 - a) skupština,
 - b) nadzorni odbor,
 - c) turističko vijeće,
 - d) predsjednik,
 - e) ured za podršku turizmu.
- (2) Statutom Turističke zajednice može se predvidjeti osnivanje i drugih organa.
- (3) Članovi organa odgovorni su za zakonito i savjesno obavljanje svojih dužnosti.

Član 7.

(Mandat članova organa Turističke zajednice)

- (1) Mandat članova organa Turističke zajednice je četiri godine, a članovi mogu biti ponovno birani, odnosno imenovani na još jedan mandat.
- (2) U slučaju prestanka mandata člana organa prije isteka vremena na koje je biran, novi član se bira na vrijeme do isteka mandata na koji je izabran prethodnik.

Član 8.

(Osnivačka skupština Turističke zajednice)

- (1) Osnivačku skupštinu Turističke zajednice (u daljem tekstu: osnivačka skupština) čine predsjednik dva člana koje će imenovati Vlada Kantona Sarajevo (u daljem tekstu: Vlada) u roku od 15 dana od dana stupanja na snagu ove odluke sa mandatom do imenovanja predsjednika i članova skupštine Turističke zajednice u postupku utvrđenim zakonom.
- (2) Osnivačka skupština donijet će:
 - a) Poslovnik o radu skupštine,
 - b) Statut uz prethodnu saglasnost Vlade.
- (3) Pripremne radnje za osnivanje Turističke zajednice i sazivanje osnivačke skupštine obavlja Ministarstvo privrede Kantona Sarajevo (u daljem tekstu: Ministarstvo).
- (4) Osnivačka skupština donijet će sve potrebne akte koji su potrebni za upis Turističke zajednice u sudski registar.
- (5) Osnivačka skupština će nakon upisa u sudski registar imenovati vršioce dužnosti drugih organa Turističke zajednice koje po zakonu imenuje skupština Turističke zajednice, sa mandatom do imenovanja u redovnom postupku.

Član 9.

(Skupština Turističke zajednice)

- (1) Skupština Turističke zajednice (u daljem tekstu: skupština) je najviši organ upravljanja u Turističkoj zajednici.
- (2) Skupštinu čine predstavnici privatnog i javnog sektora turizma iz općina i predstavnici osnivača.
- (3) Broj predstavnika članova skupštine utvrđuje se statutom, s tim da je broj predstavnika osnivača veći od predstavnika privatnog i javnog sektora.
- (4) Skupština se održava najmanje dva puta godišnje.

Član 10.

(Nadležnosti skupštine Turističke zajednice)

- (1) Nadležnosti skupštine su da:
 - a) donosi statut,
 - b) donosi poslovnik o radu skupštine,
 - c) imenuje i razrješava predsjednika skupštine iz reda članova skupštine,
 - d) imenuje i razrješava članove nadzornog odbora Turističke zajednice,
 - e) imenuje i razrješava članove turističkog vijeća,
 - f) donosi godišnji program rada i godišnji finansijski plan Turističke zajednice,
 - g) usvaja godišnji izvještaj o radu i godišnji finansijski izvještaj Turističke zajednice,
 - h) donosi odluku o osnivanju i organizaciji turističkog ureda,
 - i) donosi odluku o izvještajima koje podnose predsjednik, nadzorni odbor i turističko vijeće,
 - j) donosi odluke i rješava druga pitanja kada je to predviđeno propisima i statutom,
 - k) priprema i podnosi Skupštini Kantona plan i program rada i najmanje jednom godišnje priprema i podnosi izvještaj o radu i finansijski izvještaj.
- (2) Predsjednik skupštine saziva i predsjedava sjednicama skupštine.

Član 11.

(Nadzorni odbor Turističke zajednice)

- (1) Nadzorni odbor nadzire:
 - a) vođenje poslova Turističke zajednice,

- b) materijalno i finansijsko poslovanje i raspolaganje sredstvima,
 - c) izvršenje i provedbu programa rada i finansijskog plana.
- (2) Nadzorni odbor o izvršenom nadzoru podnosi pisani izvještaj turističkom vijeću i skupštini.
 - (3) Nadzorni odbor provodi nadzor iz stava (1) ovog člana najmanje četiri puta godišnje.

Član 12.

(Članovi nadzornog odbora Turističke zajednice)

- (1) Nadzorni odbor Turističke zajednice čine predsjednik i dva člana koje imenuje i razrješava skupština, od kojih jednog člana predlaže osnivač.
- (2) Član nadzornog odbora ne može biti član turističkog vijeća niti skupštine.
- (3) Nadzorni odbor iz redova svojih članova bira predsjednika.
- (4) Nadzorni odbor donosi poslovnik o svom radu.

Član 13.

(Turističko vijeće Turističke zajednice)

- (1) Turističko vijeće je izvršni organ skupštine.
- (2) Turističko vijeće obavlja poslove utvrđene Zakonom, ovom odlukom, statutom ili drugim propisom i za svoj rad odgovora skupštini.

Član 14.

(Nadležnost Turističkog vijeća Turističke zajednice)

- (1) Turističko vijeće nadležno je da:
 - a) provodi odluke i zaključke skupštine,
 - b) predlaže skupštini godišnji program rada i finansijski plan Turističke zajednice, te godišnji izvještaj o radu i finansijski izvještaj Turističke zajednice,
 - c) podnosi skupštini izvještaj o svom radu najmanje dva puta godišnje,
 - d) upravlja imovinom Turističke zajednice, u skladu sa Zakonom, ovom Odlukom, statutom ili drugim propisom, te u skladu sa programom rada i finansijskim planom,
 - e) donosi opće akte za stručnu službu Turističke zajednice,
 - f) imenuje i razrješava direktora turističkog ureda,
 - g) utvrđuje granice ovlaštenja za zastupanje i raspolaganje finansijskim sredstvima Turističke zajednice,
 - h) donosi poslovnik o radu,
 - i) obavlja i druge poslove utvrđene Zakonom, ovom odlukom, statutom ili drugim propisom.
- (2) Poslove i zadatke iz stava (1) alineje b), e) i f) Turističkom vijeću priprema i predlaže predsjednik Turističke zajednice.

Član 15.

(Sastav i odlučivanje Turističkog vijeća Turističke zajednice)

- (1) Turističko vijeće ima predsjednika i šest članova.
- (2) Članove turističkog vijeća bira skupština iz reda obaveznih članova Turističke zajednice, vodeći računa o teritorijalnoj zastupljenosti i o zastupljenosti djelatnosti u turizmu (pružaoci ugostiteljskih usluga, putničke agencije i dr.), a jednog člana delegira Ministarstvo.
- (3) Predsjednika turističkog vijeća biraju članovi turističkog vijeća većinom glasova iz reda svojih članova.
- (4) Turističko vijeće može pravovaljano odlučivati ukoliko sjednici prisustvuje više od polovine članova vijeća, a odlučuje većinom glasova prisutnih članova.
- (5) Predsjednik turističkog vijeća saziva i predsjedava sjednicama turističkog vijeća.

Član 16.

(Predsjednik Turističke zajednice)

- (1) Predsjednik Turističke zajednice predstavlja i zastupa Turističku zajednicu bez ograničenja.
- (2) Predsjednik Turističke zajednice podnosi prijavu za upis u sudski registar u roku od 15 dana od dana održavanja osnivačke skupštine.
- (3) Predsjednika Turističke zajednice imenuje i razrješava Vlada.

(4) Mandat predsjednika Turističke zajednice je četiri godine i može biti ponovno imenovan na još jedan mandat.

IV - FINANSIRANJE TURISTIČKE ZAJEDNICE

Član 17.

(Prihodi Turističke zajednice)

Prihodi Turističke zajednice su:

- prihodi od boravišne takse,
- prihodi iz Budžeta Kantona, budžeta jedinica lokalne samouprave, na osnovu posebnih programa,
- prihodi od obavljanja djelatnosti iz člana 61. stav (2) Zakona,
- prihodi od dobrovoljnih priloga i darova,
- prihodi iz drugih izvora.

V - AKTI TURISTIČKE ZAJEDNICE

Član 18.

(Akti Turističke zajednice)

Akti Turističke zajednice su statut i drugi opći akti kojima se regulišu odnosi u Turističkoj zajednici.

Član 19.

(Statut Turističke zajednice)

- Prava i obaveze Turističke zajednice utvrđuju se zakonom i statutom Turističke zajednice.
Statut Turističke zajednice sadrži odredbe o:
 - nazivu i sjedištu,
 - djelatnosti Turističke zajednice,
 - zadacima Turističke zajednice,
 - pravima, obavezama i odgovornosti članova,
 - načinu predstavljanja i zastupanja Turističke zajednice,
 - djelokrugu, organizaciji, načinu izbora i opoziva, mandatu te odgovornosti članova organa Turističke zajednice,
 - načinu odlučivanja u Turističkoj zajednici i organima Turističke zajednice,
 - načinu ostvarivanja javnosti rada,
 - načinu donošenja statuta i drugih općih akata,
 - imovini, načinu sticanja imovine i raspolaganju imovinom,
 - postupku sa imovinom u slučaju prestanka Turističke zajednice,
 - drugim pitanjima od značaja za djelovanje Turističke zajednice.
- Turistička zajednica donosi statut i odluku o izmjenama i dopunama statuta uz prethodnu saglasnost Vlade.
- Na statut Turističke zajednice saglasnost daje Vlada.
- Statut Turističke zajednice i njegove izmjene i dopune objavljuju se u "Službenim novinama Kantona Sarajevo".

VI - PRESTANAK POSTOJANJA TURISTIČKE ZAJEDNICE

Član 20.

(Prestanak postojanja Turističke zajednice)

- Turistička zajednica prestaje postojati na osnovu:
 - odluke skupštine o prestanku Turističke zajednice uz saglasnost osnivača,
 - odlukom osnivača o zabrani djelovanja Turističke zajednice.
- Odluku iz stava (1) tačke b) ovog člana, osnivač donosi iz sljedećih razloga:
 - ako Turistička zajednica donosi opće akte suprotno Zakonu, ovoj odluci, statutu ili drugom propisu ili zbog povreda zakona i drugih propisa,
 - kada se u Turističkoj zajednici ne održe izbori za novu skupštinu, u skladu sa Zakonom, ovom odlukom, statutom ili drugim propisom.
 - kada se ni u roku od 60 dana od dana provedenih izbora ne konstituira skupština Turističke zajednice,
 - ako ne izvrši mjere koje je naložio osnivač.

VII - PRELAZNE I ZAVRŠNE ODREDBE

Član 21.

(Troškovi osnivanja)

Troškove osnivanja Turističke zajednice snosi osnivač.

Član 22.

(Primjena Zakona)

- Na pitanja koja nisu regulisana odredbama ove odluke shodno se primjenjuju odredbe Zakona o turizmu ("Službene novine Kantona Sarajevo", broj 19/16).
- Funkcije navedene u organima Turističke zajednice odnose se na oba pola.

Član 23.

(Stupanje na snagu)

Ova odluka stupa na snagu narednog dana od dana objavljivanja u "Službenim novinama Kantona Sarajevo".

Broj 01-05-27203/16
07. septembra 2016. godine
Sarajevo

Predsjedateljica
Skupštine Kantona Sarajevo
Prof. **Ana Babić**, s. r.

Na osnovu člana 18. tačka m) Ustava Kantona Sarajevo ("Službene novine Kantona Sarajevo", broj 1/96, 2/96, 3/96, 16/97, 14/00, 4/01, 28/04 i 6/13) i člana 8. Zakona o imovini Kantona Sarajevo ("Službene novine Kantona Sarajevo", br. 6/97, 9/98, 5/10 i 27/16), Skupština Kantona Sarajevo, na sjednici održanoj dana 07.09.2016. godine, donijela je

ODLUKU

O DAVANJU SAGLASNOSTI NA NACRT SPORAZUMA O REGULISANJU MEĐUSOBNIH PRAVA I OBAVEZA IZMEĐU KANTONA SARAJEVO - MINISTARSTVO SAOBRAĆAJA KANTONA SARAJEVO I OPĆINE NOVO SARAJEVO NA ZAJEDNIČKOJ IZGRADNJI PODZEMNE GARAŽE G3 U ULICI KOLODVORSKA U SARAJEVO

I

Daje se saglasnost na Nacrt sporazuma o regulisanju međusobnih prava i obaveza između Kantona Sarajevo - Ministarstvo saobraćaja Kantona Sarajevo i Općine Novo Sarajevo na zajedničkoj izgradnji podzemne garaže G3 u ulici Kolodvorska u Sarajevu.

II

Daje se saglasnost Ministarstvu saobraćaja Kantona Sarajevo da u skladu sa pozitivnim zakonskim propisima preduzme sve aktivnosti na realizaciji Sporazuma o regulisanju međusobnih prava i obaveza između Kantona Sarajevo - Ministarstvo saobraćaja i Općine Novo Sarajevo na zajedničkoj izgradnji podzemne garaže G3 u ulici Kolodvorska u Sarajevu.

III

Daje se saglasnost ministru saobraćaja Kantona Sarajevo za potpisivanje Sporazuma iz tačke II ove odluke.

IV

Ova Odluka stupa na snagu danom donošenja, a objavit će se u "Službenim novinama Kantona Sarajevo".

Broj 01-05-27204/16
07. septembra 2016. godine
Sarajevo

Predsjedateljica
Skupštine Kantona Sarajevo
Prof. **Ana Babić**, s. r.